



## Mara Zote Aliwasilisha

### Neno la Mungu

**A** kamwambia, Imeandikwa nini katika torati? Wasomaje?—**Luka 10:26.** Mwokozi aliifanya kila kazi ya uponyaji kuwa fursa ya kupandikiza kanuni za Mungu akilini na nafsini. Hili lilikuwa kusudi la kazi Yake. Alitoa Baraka za kidunia, ili kwamba aweze kuielekeza mioyo ya wanadamu kupokea injili ya neema Yake.

Kristo angeweza kuwa na nafasi ya juu sana miongoni mwa walimu wa taifa la Kiyahudi, lakini badala yake alichagua kúpeleka injili kwa maskini. Alienda kila mahali ili kwamba wale walio katika njia kuu na ndogondogo waweze kusikia maneno ya ukweli. Ufukweni, mlimani, katika mitaa ya mji, ndani ya Sinagogi, sauti Yake ilisikiwa akiyafafanua Maandiko. Mara kwa mara alifundisha katika nyua za Hekalu, ili kwamba Mataifa waweze kusikia maneno Yake.

Mafundisho ya Yesu yalikuwa tofauti kabisa na ufafanuzi wa Maandiko uliotolewa na Waandishi na Mafarisayo, kiasi kwamba yaliteka usikivu wa watu. Marabi walijikita katika tamaduni, juu ya nadharia za wanadamu na makisio. Mara nyingi kile ambacho wanadamu walifundisha na kuandika kuhusu Maandiko kiliwekwa mahali pa Maandiko yenyewe. Lakini kitabu cha mafundisho ya Yesu kilikuwa Neno la Mungu. Alikabiliana na wauliza maswali kwa maneno Dhahiri, “Imeandikwa,” “Je! Yasemaje Maandiko?” “Wasomaje?” Katika kila nafasi, wakati ari ilipoamshwa pengine na rafiki au adui, Aliliwasilisha Neno. Alitangaza ujumbe wa injili kwa uwazi na kwa nguvu. Maneno Yake yalitua nuru kuu katika mafundisho ya wazee na manabii, na Maandiko yaliwafikia wanadamu kama ufunuo mpya. Kamwe wasikilizaji Wake hawajawahi kuwa na uelewa wa Neno la Mungu kwa maana ya kina namna hii.

Kamwe hakujawahi kuwa na mwinjilisti kama Yesu. Alikuwa ni Bwana wa mbinguni, lakini alijinyenyekeza ili kuchukua asili yetu, ili kwamba aweze kuwafikia wanadamu pale walipo. Yesu, Mjumbe wa agano, alileta habari za wokovu kwa watu wote, matajiri na maskini, huru na wafungwa. Umaarufu Wake kama Mponyaji mkuu ulisambaa kote Palestina. Wagonjwa walikuja mahali ambapo angepita, ili kwamba waweze kumwita awasaidie. Huku pia, walikuja wengi waliotamani kusikia maneno Yake na kupokea mguso wa mkono Wake. Ndivyo alivyofanya, kwenda mji hata mji, kijiji hata kijiji, akihubiri injili na kuponya wagonjwa—Mfalme wa utukufu akiwa katika vazi la binadamu wa chini.

Alihudhuria sherehe kuu za taifa za kila mwaka, na kwa umati uliotekwa na sherehe kimtindo tu alizungumza mambo ya mbinguni, akiuleta umilele katika mtazamo wao. Aliwaletea wote hazina kutoka kwenye ghala la hekima. Alizungumza nao kwa lugha rahisi ili kwamba wasije wakashindwa kuelewa.... Alizihudumia nafsi zinazougua ugonjwa wa dhambi kwa upole na wema wa neema, akileta uponyaji na nguvu (Gospel Workers, 43-45).